


Demostracionnan en bibo di artista Belinda de Veer den Palm Beach Plaza Mall



ORANJESTAD – E artista Belinda de Veer lo duna demostracion en bibo di su obranan na Caribbean Queen, situa den Palm Beach Plaza Mall, for di 7'or pa 9'or di anochi. E tienda a bin ta honra un artista femenino, kende ta biba na Aruba y ta haci su obranan tur luna y Belinda ta e Caribbean Queen di e luna di Maart, prominentemente demostrando su bunita joyanan di koper den e tienda y demostrando e trahamento di e piesanan riba e plaza bao di strea riba diahuebs anochi. Belinda ta un artista plastico bon estableci na Aruba. El a nace aki, sin embargo el a biba y studia na Merca pa shete aña, caminda el a obtene un grado di dokter den farmacia. Di regreso na Aruba su interes den arte visual y musica a aumenta, caminda el a sigui varios tayer den "Atelier 89". E tayernan tabata wordo duna

door di docentenan conoci di e Academia Rietveld na Amsterdam y no a dura mucho cu el a transforma su cas den un atelier y un studio di musica, cu espacio pa su piano stima di cual e ta toca for di edad di nuebe. Na October 2012, Belinda a presenta un solo exhibicion titula "Paraiso den Desierto", inaugura oficialmente door di Minister di Asuntonan Economico, Social y Cultura, Michelle Hooyboer-Winklaar. Un di e piesanan exhibi tabata un escultura traha di kabelnan di koper for di Valero. E kabelnan di koper ta entre e varios materialnan recicla cu Belinda a obtene for di e sitio bandonado. E escultura titula "Jardin Encanta", a ricibi su nomber danki na e briyo magico di e koper cora di alto grado ora cu e keda ilumina door di luz di solo. Belinda tambe ta faborece e oxidacion berde di ko-

per y e ilustracion fragil cu su proyectonan ta mostra, a pesar di su durabilidad y fortaleza. Na honor di su solo exhibicion, tambe el a crea un coleccion di joyas di koper pa Semper recorda esun cu ta bisti'e y esun cu ta admira e piesa, e importancia di cambio y sostenibilidad di e sobrevivencia di mundo cu nos conoce. Su joyanan di koper ta wordo trata cu wax. Despues di cada uzo, ta wordo pidi pa laba e joyanan cu awa pa asina remove azeta corporal y salo, despues secanan cu serbete. Si e joya bira dof of casca, tin instruccionnan disponibel pa hacimento di limpi y coating den e tienda. Mientras cu e ta crea joyanan di koper, Belinda tambe ta estudiante di e Pianista Arubiano galardona, Armand Simon. Riba e combinacion di foto por tira un bista di e joyanan traha pa Belinda de Veer. □

